

Ni Presidente
Henry B. Eyring

Umuna a Mammagbaga iti
Umuna a Pangulu



Igunamgunam Ida nga Agkararag

I di ubingak a bassit, sinursuruandak nga agkararag dagiti nagannak kaniak babaen ti pagwadanda. Rinugiak babaen iti panangiladawan iti panunotko iti Nailangitan nga Ama nga adda iti adayo. Bayat ti panagdakkelko a natataengan, nagbalbaliw ti padasko iti kararag. Ti ladawan iti panunotko ket nagbalinen a maysa a Nailangitan nga Ama nga adda iti asideg, a nabalkot iti naraniag a silaw, ken am-ammonak a nasayaat. Immay dayta a panagbalbaliw idi nakagun-odak iti awan duadua a pammaneknek a pudno ti insalaysay ni Joseph Smith a padasna iti 1820 idiay Manchester, New York:

“Nakitak ti kasla adigi a lawag iti mismo a ngatuen ti ulok, a naranraniag pay ngem init, nga in-inut a nag-pababa a nagdisso kaniak.

“Nasarakak ti bagik iti saan a nabayag a naisalakan manipud iti kabusor a nanglapped kaniak. Nakitak ti dua a Kinatao idi agdisso ti lawag kaniak, nga artapan ti lawag ken tan-okda ti amin a panangiladawan, a nagtakder iti angin iti ngatuek. Maysa kadakuada ti nagsao kaniak, nga inawagannak iti naganko, ket kinunana, intudona ti kaduana—*Daytoy ti Ay-ayatek nga Anakko. Dumngegka Kenkuana!*” (Joseph Smith—Pakasaritaan 1:16–17).

Adda ti Nailangitan nga Ama iti kakaywan iti dayta nangayed nga aldaw ti panagsusulbod. Inawaganna ni

Joseph iti naganna. Ken inyam-ammona ti nangungar a Mangisalakan ti lubong kas “Ay-ayaten nga Anakna.” Iti kanito nga agkararagkayo ken sadino man ti pagkararaganyo, ti pammaneknekyo maipapan iti kinapudno dayta a nagloriaan a padas ket mabalin a mangbendision kadakayo.

Ti Ama a pagkararagantayo ket nagloriaan a Dios a nangparsua kadagiti lubong babaen ti Ay-ayatenna nga Anak. Dengdengenna dagiti kararagtayo kas iti panangdengngegna iti kararag ni Joseph—kas kalawag ti pannakairuknoyda iti imatangna. Ay-ayatennatayo unay gapu ta intedna ti Anakna kas Mangisalakantayo. Babaen iti dayta a sagut inaramidna a posible para kadatayo a magun-odtayo ti saan nga ipapatay ken agnanayon a biag. Ken idiaydiayana kadatayo, babaen iti panagkararag iti nagan ti Anakna, ti gundaway a makisarita Kenkuana iti daytoy a biag no pilientayo.

Dagiti addaan iti priesthood iti Ti Simbaan ni Jesu-cristo dagiti Santo iti Ud-udina nga Aldaw ket addaan iti sagrado a panagtalek a “mangsarungkar iti balay ti tunggal kameng, ket *igunamgunamna kadakuada nga agkararag a sibabatad ken iti nalimed*” (DkK 20:47; nainayon ti panangyunay-unay).

Adu a wagas a pangigunamgunam iti maysa a tao nga agkararag. Kas pagarigan, maipanekektayo

a binilinnatayo ti Dios nga agkararag a kanayon, wenna mabalintayo nga iladawan dagiti pagarigan manipud iti nasantuan a kasuratan wenna manipud iti bukodtayo a padas maipapan kadagiti bendision a sumangbay manipud kadagiti kararag ti panagyaman, panagdawat, ken panagdamag. Kas pagarigan, maipanekeke nga ammok a sungsubatan ti Nailangitan nga Ama dagiti kararag. Immawatak iti pangiturong ken liwliwa manipud kadagiti balikas nga immay iti panunotko, ken ammok babaen iti Espiritu a naggapu iti Dios dagiti balikas.

Naaddaan ni Propeta Joseph Smith kadagiti kasta a padas, ket kasta met a maaddaankayo. Naawatna daytoy a sungbat iti naimpusuan a kararag:

“Anakko, pagtalnaem ti kararuam; saan nga agbayag ti rigatmo ken dagiti sagabaem;

“Ket kalpasanna, no agituredka, itan-oknakanto ti Dios iti ngato” (DkK 121:7–8).

Paltiing dayta a naggapu iti maysa a managayat nga Ama iti maysa a napudno nga anak a lalaki a nakaro ti sagabaenna. Mabalain ti tunggal anak ti Dios ti maki-sarita Kenkuana iti kararag. Ti rikna ti ayat ken lawag nga immay kaniak kas sungbat dagiti napakumbaba a kararagko ket dakdakkal ti samayna kaniak ngem iti ania man a pangallukoy nga agkararag.

Magun-odtayo ti pammaneknek maipapan iti ania man a bilin ti Dios babaen ti panagtungpal iti dayta a bilin (kitaen iti Juan 7:17). Pumudno daytoy iti bilin nga agkararagtayo a sibabatad ken iti nalimed. Kas mannursuro ken gayyemyo, ikarik a sungsubatan ti Dios dagiti kararagyo ken babaen ti pannakabalin ti Espiritu Santo, maammuanyo mismo a naggapu Kenkuana dagiti sungbat.

PANANGISURO MANIPUD ITI DAYTOY A MENSAHE

- “Dagiti ladawan ket napateg a ramit para iti panangpangpiga iti kangrunaan a kapanunotan ti maysa nga adalen” (*Teaching, No Greater Call* [1999], 176). Mangipakita iti maysa a naipinta a ladawan ni Joseph Smith wenna ti Umuna a Parmata. Ilawlawag ti padas ni Joseph Smith iti kararag. Kasano nga agbalin a napatpateg dagiti

kararagmo no inladawan iti panunotmo ti “Nailangitan nga Ama . . . nga adda iti asideg,” kas iti panangiladawan ni Presidente Eyring?

- Kas iti isingsingasing ni Presidente Eyring, ibilangyo ti panangiburay iti pammaneknekyo maipapan iti kararag, nga iladawanyo dagiti bendision a naawatyon gapu iti kararag, wenna panangibinglay kadagiti nasantuan a kasuratan maipapan iti kararag.

AGTUTUBO

Ti Kararagko ti Pammati

Ni Priscilla Farias de Lima

Idi agtawenak iti 18, nagtrabahoak iti pagtagilakuan ti muebles kas paralako. Narigat unay ti iskediuiko ti trabaho. Agtrabahoak manipud iti 8:00 a.m. agingga 10:00 p.m., Lunes agingga iti Sabado. Nagladingitak gapu ta saanak a makadar-ay iti institute ken kadagiti aktibidad iti Simbaan.

Rinugiak ti nagkararag iti Nailangitan nga Ama a sipapammatak unay tapno agkiddaw Kenkuana a tulonngannak a makasarak iti maysa a pagtrabahuan a diak kasapulan ti agtrabaho kadagiti Sabado tapno makapanak iti institute ken iti dadduma pay nga aktibidad iti Simbaan.

Maysa nga aldaw iti trabahok tultulongak ti maysa a lalaki. Nagsarsaritakami, ket kinunana nga agtrabaho isuna iti maysa a dakkal a banko. Sinaludsodko no kasano a makikompetensiaak para iti aglukat a pagtrabahuan iti daytoy a negosio. Intedna ti nagan ken numero ti teleponona ket imbagana kaniak a mabalinko a tawagan ti recruiter ket ibagak nga am-ammok isuna. Napanak iti banko ket inleppasko dagiti kasapulan nga eksamen. Nakaruarak iti eksamen ket nangrugiak a nagtrabaho iti innem nga oras iti maysa nga aldaw manipud Lunes agingga iti Biernes, a mamitlo ti kadakkal ti sueldok iti sigud a trabahok.

Ammok a tartarabayennatayo ti Apo no tarigagayantayo nga Isu ti umuna nga ipangpangrunatayo. Tartarabayennak pay laeng ita nga agdama. Ammok a pudno ti pagbatayan ti kararag.



Pammati, Pamilia, Tulong

Dagiti Agbambantay ti Pagtaengan

Adalenyoy daytoy a material, ken no maitutop, paglilinnawaganyoy daytoy kadagiti kakabsat a babbai a sarungkaranyoy. Usarenyo dagiti saludsod a mangtulong kadakayo a mangpapigsa kadagiti kakabsatyo a babbai ken mangaramid iti Relief Society nga aktibo a paset iti bukodyo a biag.

"Dakayo dagiti agbambantay ti pangtaengan," kinuna ni Presidente Gordon B. Hinckley (1910–2008) bayat ti panangyammona iti "Ti Kaamaan: Maysa a Waragawag iti Lubong" iti sapisap a miting ti Relief Society idi 1995. "Dakayo dagiti agpasngay kadagiti ubbing. Dakayo dagiti mangpatanor kadakuada ken mangipasdek iti kaungganda kadagiti galad iti panagbiagda. Awanen ti sabali pay nga aramid a kinadiosan a kas iti panangpatanor kadagiti annak a lallaki ken babbai ti Dios."¹

Iti dumani 17 a tawen itan a maipatpatungpal daytoy a waragawag a kaaduan kadagiti kangrunaan a pagrebbengantayo ket maisentro iti panangpapigsa kadagiti kaamaan wenno pagtaengan—ania man dagiti agdama a kasasaadtayo. Ni Barbara Thompson, a maikadua a mammagbaga itan iti sapisap a pangulueng ti Relief Society, ket adda iti Salt Lake Tabernacle idi umuna nga imbasa ni Presidente Hinckley ti waragawag. "Naindaklan dayta nga okasion," malagipna. "Nariknak ti kinapateg ti mensahe. Napampanunotko pay, 'Nasayaat a pangiwawwan daytoy para kadagiti nagannak. Dakkel pay a pagrebbengan daytoy para kadagiti nagannak. 'Napanunotko iti apagkanito a saan a maipanggep unay kaniak gapu ta awan pay asawak ken

awan pay annakko idi. Ngem alisto a napanunotko, 'Ngem maipanggep kaniak daytoy. Miembroak ti maysa a pamilia. Maysaak nga anak a babbai, kabsat a babai, ikit, kaanakan, wenno apoko a babai. Addaanak kadagiti pagrebbengan—ken bendision—gapu ta miembroak ti maysa a pamilia. Uray no sisiak laeng ti sibibiag a miembro ti familiak, maysaak latta a miembro ti kaamaan ti Dios, ket addaanak iti pagrebbengan a tumulong a mangpapigsa kadagiti dadduma a pamilia.'"

Pagsayaatanna, saantayo nga agmaymaysa kadagiti panagkagumaantayo. "Ti kadakkelan a tulong," kuna ni Sister Thompson, "nga addanto kadaytoy iti panangpapigsa kadagiti kaamaan ket ti panangammo ken panangsurot kadagiti doktrina ni Cristo ken panangpanuray Kenkuana a mangtulong kadaytoy."²

Manipud iti Pakasaritaantayo

"Idi nagserbi ni Sister Bathsheba W. Smith kas maikapat a sapisap a presidente ti Relief Society [manipud iti 1901 agingga iti 1910], nakitana ti panagkasapulan a panangpapigsa kadagiti kaamaan, ket isu a nangipasdek isuna kadagiti adalen iti edukasion iti ina para kadagiti kabsat a babbai iti Relief Society. Dagiti adalen ket mairaman

ti balakad maipapan iti panagkallaysa, panangtaripato kadagiti masikog a babbai, ken panangpaddakkel iti ubbing. Dagitoy nga adalen ti nangsuporta kadagiti pannursuro ni Presidente Joseph F. Smith maipapan iti Relief Society a mangtulong kadagiti babai kadagiti akemda iti pagtaengan:

"'Iti kanito a saan nga ammo wenno kurang ti pannakaawat mapanggep iti pamilia wenno kaamaan, pagrebbengan ken obligasion ti kaamaan a nasken nga adda ken nainkalintegang nga adda kadagiti agassawa ken kadagiti nagannak ken annak, adda iti daytoy nga organisasion wenno iti asideg, ken babaen kadagiti gagangay a talugading ken pammaregta nga ikikutang ti organisasion nakasagandan a mangted iti panangiturong no maipanggep kadagiti a napapateg a pagrebbengan.'"³

DAGITI NAGADAWAN

1. Gordon B. Hinckley, "Stand Strong against the Wiles of the World," *Ensign*, Nob. 1995, 101.
2. Barbara Thompson, "I Will Strengthen Thee; I Will Help Thee," *Liahona* ken *Ensign*, Nob. 2007, 117.
3. *Daughters in My Kingdom: The History and Work of Relief Society* (2011), 153.

Manipud kadagiti Nasantuan a Kasuratan

Proverbio 22:6; 1 Nephi 1:1; 2 Nephi 25:26; Alma 56:46–48; Doktrina ken Katulagan 93:40

Ania ti Maaramidko?

1. Kasano a matulongak dagiti kabsat a babbai nga ay-aywanak a mangpapigsa kadagiti pamiliada?

2. Kasano a makapagbalinak a nalinteg nga impluensia iti pamiliak?

Para iti ad-adu pay nga impormasion, mapan iti reliefsociety.lds.org.